

Headlines

1. लेफ्टिनेंट गवर्नर मनोज सिन्हा होरें श्रीनगर च कश्मीर साहित्य उत्सव दे त्रीये संस्करण दा उद्घाटन कीता। उनें लखारिएं गी गुजारश कीती जे ओहू रचनात्मक शैली दे राहें सार्थ विचारधारा गी आकार देन।
2. उपमुख्यमंत्री सुरिंद्र चौधरी होरें जम्मू च बाग-ए-बाहु आले डाक बंगले च जारी निर्माण कम्में दा जायजा लैता। उनें अधिकारिएं गी गुणवत्ता बरकरार रक्खदे होई कम्मै च तेजी आहने दे निर्देश दित्ते।
3. पुंछ च इक मकामी जागतै आसेआ फौरी अलर्ट दे मगरा सुरक्षाबलें मोर्टार शैल गी कामयाबी कन्नै नकारा बनाई दित्ता।
4. जम्मू च पैहली शा 30 जून धोड़ी घर-घर जाइयै लैते जाने आहले मरदमशुमारी दे आंकड़ें सरबन्धी अभियान लेई तैयारियां जारी।
5. मौसम विभाग नै मानसून दरान प्रदेश च सामान्य जां एहदे शा घट्ट बरखा बरने ते जून म्हीने केई इलाकें च सामान्य शा मती बरखा बरने दी भविक्खवाणी कीती ऐ।

<><><><><><>

LG-Festival

लेफ्टिनेंट गवर्नर मनोज सिन्हा होरें अज्ज श्रीनगर च त्रीये कश्मीर साहित्य महोत्सव दा उद्घाटन कीता। इस मौके पर बोलदे होई उनें लेखकें गी आखेआ जे ओहू काल्पनिक कथाएं, वास्तविक तथ्यें ते होरनें रचनात्मक विधाएं दा उपयोग लोके गी प्रेरित करने ते उंदे च सकारात्मक विचारें गी बढद्यावा देने आस्तै करन। मनोज सिन्हा होरें आखेआ जे लेखकें दा कम्म शब्दें कोला बड़ा मता होंदा ऐ, जेड़ा समाज दी नब्ज गी पंछानदा ऐ। उनें औपनिवेशक मानसिकता गी छोड़ने दा आह्वान कीता ते विदेशें च भारत दे इतिहास ते अज्जै दी स्थिति गी गलत तरीके कन्नै पेश करने प्रति चेतावनी दित्ती। उपराज्यपाल होरें आखेआ जे लेखकें दा एहू फर्ज बनदा ऐ जे ओहू इस चाल्ली दियें गलतियें गी ठीक करन ते दुनियै भरै दे पाठकें तगर सच्चाइ पजान।

<><><><><><>

Dy Cm Bagh-e-Bahu

उपमुख्यमंत्री सुरिंदर चौधरी होंरें अज्ज जम्मू दे बाग-ए-बाहु आहले डाक बंगले च जारी निर्माण कम्में दा जायजा लैता। इस मौके पर उ'नें सरबंधत अधिकारिएं गी निर्देश दित्ते जे ओहू गुणवत्ता सरबंधी मानकें गी बरकरार रक्खदे होई निर्माण कम्में च तेजी आहनन। उ'नें आखेआ जे बाग-ए-बाहु च औने आहलें गी बेह्तरिन सुविधां उपलब्ध करोआने लेई इस निर्माण कम्म दा समें-सिर सबूरा कीता जाना बड़ा गै महत्वपूर्ण ऐ। अधिकारिएं गी आखेआ गेआ जे ओहू कम्में च हासल प्रगति दी नियमित तौर पर निगरानी करदे रौहन ते सुरक्षा ते निर्माण सरबंधी सबनें दिशा-निर्देशों दी पालमा जकीनी बनान। इस परियोजना दा मकसद सैलसफा मतल्लक ढांचे दा बाद्दा-विस्तार करना ते सैलानिएं गी बेह्तरिन तजुर्बा हासल करोआना ऐ।



Mortar Shell Poonch

पुंछ च इक एस.के.पुले दे कश जागर्स बगीचे च इक जींदा मोटारि दा गोला बरामद कीता गेआ। इक मकामी जागतै इस संदिग्ध चीजै गी दिक्खेआ ते तुरत पुलसै गी सूचना दित्ती। स्हाढे जिला संवाददाता दी रिपोर्ट दे मताबक पुलसै दस्सेआ ऐ जे इक जागतै बगीचे दे नेडे गोला पेदा दिक्खेआ ते तुरत उनेंगी जानकारी दित्ती। तुरत कार्रवाई करदे होई पुलस दी इक टीम नै मौके पर पुज्जियै इलाके गी सुरक्षित कीता ते गोले गी बी सुरक्षित थाहै पर पजाया, मगरा फौज दे बम्ब नकारा करने आहले सीगे नै गोले गी बगैर कुसै नुकसान दे नकारा करी दित्ता। अधिकारियें उस जागता दी सतर्कता दी सराहना कीती ते लोकं अग्गे अपील कीती जे उनेंगी कोई बी नेही संदिग्ध वस्तु लब्बै ते उसी हत्थ नेइ, लान ते ओहदी सूह तुरत पुलस गी देन।



Op. Sheruwali

राजौरी दे गंभीर मुगलन खेत्तर च आपरेशन शेखवली अठमें रोज च दाखल होई गेआ ऐ जित्थे सुरक्षाबलें डोरी मल जंगलै च आतंक रोधी अभियान जारी रक्खे दा ऐ। अधिकारियें दस्सेआ ऐ जे घने जंगलें ते दुर्गम प्हाडी इलाकें च तलाशी अभियान जारी ऐ जेह्दे कन्नै इलाके च सुरक्षा बंदोबस्त बडे निग्गर बनाए दे ना। सुरक्षा बलें खतरे गी खत्म करने आस्तै ते खेत्तर गी पूरी चाल्ली कन्नै सुरक्षित बनाने आस्तै सख्त निगरानी रक्खी दी ऐ। पिछले शनिवारें डोरीमल गंभीर मुगलन इलाके च सुरक्षाबलें ते आतंकवादिएं बश्कार उसलै टाकरा भखेआ हा जिसलै खुफिया

जानकारी दे मताबक सांझी टीम नै इलाके च किश आतंकवादियें दी मौजूदगी बारै सूह थ्होने मगरा अभियान शुरू कीता हा।

<><><><><><>

Census

जम्मू च औंदी पैहली थमां 30 जून तगर करोआए जाने आहले घर-घर जाइयै मरदमशुमारी सरबंधी आंकड़े किट्टे करने दे अभियान कोला पैहले सबनें जिलें च इसगी लेइयै तैयारियां जोरें-शोरें जारी न। मद्र तैहसील च अज्ज इन्वुमिरेटरें ते सुपरवाईजरें गी मरदमशुमारी सरबंधी किट्टां तकसीम कीतीआं गेइयां। सरबंधत अधिकारिएं दा आखना ऐ जे इस अभियान दे दरान सरबंधत अमला, घर-घर जाइयै लोके कन्नै मिलग ते घरें-मकानें ते आबादी सरबंधी सटीक आंकड़े कठेरना जकीनी बनाग। बसनीके गी गुजारश कीती गेई ऐ जे ओहू इस सर्वेक्षण गी बवस्थित ते कामयाबी आहले ढंगै'नै सबूरा करोआने च अपना पूरा-पूरा सैह्योग देन। ध्यानजोग ऐ जे जम्मू च ऐल्लै आपूं आनलाईन अपने ब्यौरे दर्ज करने सरबंधी सेल्फ इन्वुमिरेशन आहली प्रक्रिया चला करदी ऐ ते एहू कल 31 मई धोड़ी जारी रौहग।

<><><><><><>

PM-MKB

प्रधानमंत्री नरेन्द्र मोदी होर कल ऐतवारें दिनै 11 बजे आकाषवाणी दे अपने 'मन की बात' कार्यक्रम राएं देष-बदेष च रौहने आहले लोके कन्नै बचार सांझे करडन। एहू इस माहवार रेडियो कार्यक्रम दी 134मीं किष्ट होग, जेहदा प्रसारण आकाषवाणी ते दूरदर्शन दे समूलचे नेटवर्क उप्पर कीता जाग। एहदे अलावा प्रधानमंत्री हुं'दे दफ्तर, सूचना ते प्रसारण मंत्रालय ते आकाषवाणी ते दूरदर्शन दे यू-ट्यूब चैनलें पर बी एहदा प्रसारण होग। इस कार्यक्रम गी आकाशवाणी खबरें दी वैबसाइट www.newsonair.com ते newsonair मोबाईल ऐप्प पर बी प्रसारित कीता जाग। आकाषवाणी आसेआ हिंदी प्रसारण दे तुरत मगरा, एहदा इलाकाई भाशाएं च अनुवाद बी प्रसारण कीता जाहग। इलाकाई भाशाएं च एहदा अनुवाद प्रसारण रातीं 8 बजे परतियै बी प्रसारत होग।

<><><><><><>

Ramban-Flowering

रामबन जिले दी बटोत तहसील च महिला स्वयं सहायता समूह रिवायती मक्के दी फसलें दे थाहर गुट्टे दे फुल्लें दी काशत आहली बक्खरी तेजिया कन्नै बधा'रदियां न। एहू बदलाव बड़ा मता लाहू हासल कराने आहला, घट्ट समानं लैने आहला ते करसानें गी फसलां बर्बाद करने आहले बांदरें दे त्राह थमां निब्बडने आस्तै मददगार साबत होआ'रदा ऐ। राईबाई मैहकमा स्वयं सहायता समूह दे सदस्यें गी मुफ्त हाइब्रिड बीड, तकनीकी सिखलाई ते समें-समें पर मार्गदर्शन करा'रदा ऐ। कृषि विान केंद्र दे माहिर रामबन च वर्कशपें दा आयोजन करियै करसानें गी वैज्ञानिक तरीकें कन्नै फसल राहने ते उसी बमारियें थमां बचाव दी सिखलाई देआ'रदे न। करसानें दा आखना ऐ जे इस पैहल कन्ने आमदनी च बादा होआ'रदा ऐ जे जिले च जंगली जनौरें थमां होने आहले नुकसान च बड़ी मती कमी आवा'रदी ऐ।



Rajouri Sports

राजौरी जिले च कब्जा रेखा कन्नै लगदे ग्राएं च युवा मामलें ते खेड्ड मंत्रालय तैहत माई भारत मैहकमे नै उत्थूं दे नौजवानें गी खेड्डें सरबन्धी उपकरण बंडे। इस कार्जक्रम दा सरिस्ता राज्य निदेशक नितिन हेंग्लू ते राजौरी दे जिला युवा अधिकारी अखिल आर्या हुंदी अगुवाई च कीता गेआ। खेलो इंडिया स्कीम तैहत बन्ने कन्नै लगदे इलाकें दे नौजवानें गी खेड्ड क्लबें च किट्टा कीता गेआ ते खेड्ड संस्कृति ते उंदी प्रतिभा गी बढावा देने आस्तै खेड्डें आहला समान प्रदान कीता गेआ। नितिन हेंग्लू होरें आखेआ ऐ जे इस पैहलकदमी दा मकसद बन्नै कन्नै लगदे इलाकें च रौहने आहले नौजवानें गी सशक्त बनाना ऐ ते खेड्डें च उंदी सक्रिय भागीदारी गी बढावा देना ऐ तां जे उंदा पूरा-पराता विकास होई सकै।



Weather

मौसम विभाग दे श्रीनगर केंद्र नै दक्खन पच्छिम मानसून-2026 बारै भविक्खवाणी जारी करी दित्ती ऐ। एह्दे मूजब जम्मू-कश्मीर दे मते सारे हिस्सें च इस ब'रे जून थमां सितंबर धोड़ी सामान्य जां सामान्य शा घट्ट बरखा दी मेद ऐ। भविक्खवाणी च औने आह्ले म्हीनें दरान खित्ते दिएं केई सारी थाहें पर बक्ख-बक्ख दर्जे दी बरखा बरने ते औंदे जून म्हीने दरान केई इलाकें च सामान्य थमां मती बरखा बरने दे बी असार न। लोकें गी आखेआ गेआ ऐ जे ओहू मौसम च होने आह्ले इ'नें बदलावें लेई तैयार रौहना। तोआई, मौसम विभाग नै जम्मू-कश्मीर च च अज्ज बरखा, गरज-चमक, ऐन-गड़े ते अंधी-झक्खड़ दी भविक्खवाणी कीती दी ऐ। उआं 31 मई थमां 3 जून तगर मौसम आमतौरा पर खुशक रौहग जिसले के 4 ते 5 जून गी फ्ही बरखा दी मेद ऐ।

<><><><><><>